

Ẹkwo  
Ẹzura

Sayirosu atọ ekemu gẹ ndu a kpuru lẹ ndzọ laphu azọ

*(2Iphe 36:22-23)*

<sup>1</sup> O be l'apha kẹ mbụ, Sayirosu wataru aburu eze ndu Peshiya; Chipfu nwusaa Sayirosu, bu eze ndu Peshiya obu; ọ raa ozi arara l'alì-eze iya l'opfu; bya edekwapho ozi ono edede l'ekwo. Iphe ono buru g'ee-shi g'opfu ono, Chipfu shi l'onu Jieremaya pfua ono vukota.

<sup>2</sup> Waa iphe, Sayirosu, bu eze ndu Peshiya pfuru baa:

“Chipfu, bu Chileke k'imigwe nukotawaru mu alì-eze, nokota lẹ mgboko-a; bya asuwa mu gẹ mu kpuaru iya ọlo lẹ Jierusalemu ono, du l'alì Jiuda. <sup>3</sup> Iphe, bukpo onye kẹ Chileke, no l'echilabo unu; gẹ Chileke iya ono swikwaru iya okpobe eswiru. G'onye obu tugbua lashia Jierusalemu ono, du l'alì Jiuda je akpu ọlo Chipfu, bu Chileke kẹ izerelu; mbu Chileke ono, no lẹ Jierusalemu.

<sup>4</sup> A -bya lẹ ndu phoduru nu l'eka-a ephe lwaru alwalwa-a; gẹ ndu ephe bu l'eka iya nkephe gude mkpola-ochaa; me mkpola-ododo yetaru phe eka; ephe anu phe ivu ozo, du iche iche; me iphe-edobe; mewaro iphe ozo, shi phe l'obu futu g'ephe gude je akpu ọlo Chileke lẹ Jierusalemu.”

<sup>5</sup> Tobudu iya bu; ndu bugbaa ishi l'unuphu l'unuphu; l'ipfu Jiuda; me kẹ Benjaminu; me ndu-uke Chileke; me ndu Lívayi; mbu iphe, bukpo onye Chileke yeru iya l'obu tuko wulihu jeshia akpu ọlo Chipfu ono lẹ Jierusalemu. <sup>6</sup> Ndu obutobu phe gweru ivu mkpola-ododo me mkpola-ochaa nu phe gude yetaru phe eka;

me ivu ozo, du iche iche; me iphe-edobe; me iphe, vugbaa okaswa; a -gufukwa iphe, shi phe l'obu futa, e phe nuchaaru phe.

<sup>7</sup> Eze, bu Sayirosu gwefutakwapho ivu ulo Chipfu ono, Nebukadineza shi gweta le Jierusalemu je edobe l'ulo agwa iya pho. <sup>8</sup> O buru onye edobeje okpoga, epha iya bu Mituredatu be Sayirosu, eze ndu Peshiya shi l'eka iya gwefuta ivu ono. Onye ono woru iya gua ogo nu Sheshubaza, bu onye-ishi ndu Jiuda.

<sup>9</sup> Waa g'ivu ono ha baa:

Gbamugbamu mkpola-ododo  
 be du ukporo l'iri;  
 gbamugbamu  
 mkpola-ochaa du  
 unu labo l'ukporo iri;  
 iphe, eegudeje akpo  
 unwu-isensu oku,  
 e meru le mkpola-ochaa  
 du ukporo le tete.

<sup>10</sup> Ochi, e meru le  
 mkpola-ododo du  
 ukporo l'iri.

Ochi, e gude  
 mkpola-ochaa mee,  
 l'udu iya l'udu iya  
 du unu ochi l'ochi iri.

Unwu ivu ozo, dugbaa  
 nu du unu l'ukporo iri.

<sup>11</sup> Ivu, e meru le mkpola-ododo; me ke mkpola-ochaa be du unu iri l'eto l'ukporo iri. Ivu ono g'o ha bu ivu, Sheshubaza gwelataru teke ndu ono, a kpuru le ndzu laa ali Babilonu ono lwaru Jierusalemu.

## 2

*Ndu lwaru* nū lẹ ndu ono a kpuru lẹ ndzū ono

<sup>1</sup> Waa ndu Ízurẹlu ono, shi l'alì Bábìlọnu lwa; mbụ ndu ono, a kpụjeru lẹ ndzū laa alì ọzo, bụ iya bụ ndu Nebukadineza, bụ eze ndu Bábìlọnu kpụkojeru laa Bábìlọnu. Ẹphe lwaru Jierúsalemụ; mẹ Jiuda; onyenọnu lashichaa mkpukpu ẹka o shi. <sup>2</sup> Ndu ẹphe tso lwa bẹ bụ Zerúbabelu; mẹ Jieshuwa; mẹ Nehemaya; mẹ Seraya; mẹ Relaya; mẹ Mọdekayi; mẹ Bilishanu; mẹ Misupa; mẹ Biguvayi; mẹ Rehumu; waa Bana.

Waa gẹ ndu Ízurẹlu ono ha bụ ọwana:

<sup>3</sup> Oshilọkpa Paroshi bẹ dū

    unu ise l'ụkporo ụmadzu ẹsato;  
    l'ụmadzu iri l'ẹbo.

<sup>4</sup> Oshilọkpa Shefataya dū

    ụkporo ụmadzu iri l'ẹsato  
    l'ụmadzu iri l'ẹbo.

<sup>5</sup> Oshilọkpa Ara dū unu

    l'ụkporo iri l'ẹsato  
    l'ụmadzu iri l'ise.

<sup>6</sup> Oshilọkpa Pahatu-Mówabu,

    bụ iya bụ ndu shi l'eri  
    Jieshuwa yẹle Jiowabu  
    bẹ dū unu ẹsaa l'iri l'ẹbo.

<sup>7</sup> Oshilọkpa Elamu dū unu

    ẹto l'ụmadzu ụkporo labọ  
    l'ụmadzu iri l'ẹno.

<sup>8</sup> Oshilọkpa Zatu dū unu

    labọ l'ụkporo ẹsaa  
    l'ụmadzu ise.

<sup>9</sup> Oshilọkpa Zakayi dū unu

    l'ụmadzu ụkporo iri l'ẹsato.

<sup>10</sup> Oshilọkpa Bani dū unu

- l'umadzu ukporo ugbo iri  
l'ẹbo l'umadzu labo.
- 11 Oshilokpa Bebayi du unu  
l'umadzu ukporo iri le  
nanu l'onye lanu.
- 12 Oshilokpa Azugadu du  
unu eto l'umadzu ukporo  
l'ẹbo.
- 13 Oshilokpa Adonikamu  
du unu l'umadzu ukporo  
iri l'eto l'umadzu ishii.
- 14 Oshilokpa Biguvayi du  
unu umadzu ise l'umadzu  
ukporo labo l'umadzu  
iri l'ise.
- 15 Oshilokpa Adinu du unu  
l'umadzu ukporo labo  
l'iri l'eno.
- 16 Oshilokpa Ateya, bu iya  
bu ndu shi l'eri Hezekaya be  
du ukporo eno l'umadzu iri  
l'esato.
- 17 Oshilokpa Bezayi du ukporo  
umadzu iri l'ishii l'umadzu eto.
- 18 Oshilokpa Jiora du ukporo  
ise l'umadzu iri l'ẹbo.
- 19 Oshilokpa Hashumu du  
ukporo iri le nanu  
l'umadzu eto.
- 20 Oshilokpa Gibaru du ukporo  
eno l'umadzu iri l'ise.
- 21 Unwoke, shi le Betulehemu  
be du ukporo ishii  
l'umadzu eto.

- 22 Ndu kẹ Netofa bẹ dụ ụkporo  
labọ l'ụmadzu iri l'ise.
- 23 Ndu kẹ Anatotu dụ ụkporo  
ise l'ụmadzu ẹsato.
- 24 Ndu kẹ Azumavetu bẹ dụ  
ụkporo labọ l'ụmadzu  
labọ.
- 25 Ndu kẹ Kiriyaṭu-Jiarimu;  
mẹ Kefira; mẹ Berotu bẹ  
dụ ụnu l'ụmadzu ụkporo  
iri l'ẹsaa l'ụmadzu ẹto.
- 26 Ndu kẹ Rama yẹe Geba  
dụ ụnu l'ụmadzu ụkporo  
iri lẹ nanụ l'ụmadzu ẹto.
- 27 Ndu kẹ Mikumashi dụ  
ụkporo ishii l'ụmadzu labọ.
- 28 Ndu kẹ Bẹtelu; mẹ Eyayi dụ  
ụkporo iri lẹ nanụ  
l'ụmadzu ẹto.
- 29 Ndu kẹ Nebo dụ ụkporo  
labọ l'ụmadzu iri l'ẹbo.
- 30 Ndu kẹ Magubishi dụ ụkporo  
ẹsaa l'ụmadzu iri l'ishii.
- 31 Ndu kẹ Elamu ọphunapho bẹ  
dụ ụnu ẹto l'ụkporo  
labọ l'ụmadzu iri l'ẹno.
- 32 Ndu kẹ Harimu dụ ụkporo  
iri l'ishii.
- 33 Ndu kẹ Lodu; mẹ Hadidi;  
mẹ Ono bẹ dụ ụnu l'ụmadzu  
ụkporo iri l'ishii l'ụmadzu ise.
- 34 Ndu kẹ Jieriko dụ ụkporo iri  
l'ẹsaa l'ụmadzu ise.
- 35 Ndu kẹ Senaa dụ ụnu tete

l'ụkporo l'iri.

- <sup>36</sup> A bya ịe ndu-uke Chileke:  
 Oshilọkpa Jiedaya, bụ iya bụ  
 ndu shi l'ọnu-ulo ndibe  
 Jieshuwa be dū ụnu labo  
 l'ụkporo esato l'ụmadzu  
 iri l'eto.
- <sup>37</sup> Oshilọkpa Ima dū ụnu labo  
 l'ụkporo iri l'ebo l'ụmadzu  
 iri l'ebo.
- <sup>38</sup> Oshilọkpa Pasho dū ụnu  
 eto l'ụkporo labo  
 l'ụmadzu esaa.
- <sup>39</sup> Oshilọkpa Harimu dū ụnu  
 labo l'ụkporo iri l'ụmadzu  
 iri l'esaa.
- <sup>40</sup> A bya ịe ndu Lívayi:  
 Oshilọkpa Jieshuwa; me  
 Kadumelu, bụ iya bụ ndu  
 shi l'eri Hodavaya be dū  
 ụkporo eto l'ụmadzu  
 iri l'eno.
- <sup>41</sup> A bya ịe ndu aguje ebvu:  
 Oshilọkpa Asafu be dū  
 ụkporo ishii l'ụmadzu  
 esato.
- <sup>42</sup> A bya ịe ndu anọduje eche  
 nche l'ọnu-abata  
 eze-ulo Chileke:  
 Oshilọkpa Shalumu; me  
 oshilọkpa Ateya; me  
 oshilọkpa Talumonu;  
 me oshilọkpa Akubu;

mẹ oshilọkpa Hatita;  
 mẹ oshilọkpa Shobayi;  
 bẹ tukuru dū ụkporo ise  
 l'ụmadzu iri lẹ tete.

<sup>43</sup> A bya lẹ ndu anọduje eje  
 ozi l'eze-ulo Chileke bu:

Oshilọkpa Ziha; mẹ  
 oshilọkpa Hasufa;  
 mẹ oshilọkpa Tabayotu;  
<sup>44</sup> mẹ oshilọkpa Kerosu;  
 mẹ oshilọkpa Siyaha;  
 mẹ oshilọkpa Padonu;  
<sup>45</sup> mẹ oshilọkpa Lebana;  
 mẹ oshilọkpa Hagaba;  
 mẹ oshilọkpa Akubu;  
<sup>46</sup> mẹ oshilọkpa Hagabu;  
 mẹ oshilọkpa Shamulayi;  
 mẹ oshilọkpa Hananu;  
<sup>47</sup> mẹ oshilọkpa Gidelu;  
 mẹ oshilọkpa Gaharu;  
 mẹ oshilọkpa Reyaya;  
<sup>48</sup> mẹ oshilọkpa Rezinu;  
 mẹ oshilọkpa Nekoda;  
 mẹ oshilọkpa Gazamu;  
<sup>49</sup> mẹ oshilọkpa Uza;  
 mẹ oshilọkpa Paseya;  
 mẹ oshilọkpa Besayi;  
<sup>50</sup> mẹ oshilọkpa Asuna;  
 mẹ oshilọkpa Meyuni;  
 mẹ oshilọkpa Nefisimu;  
<sup>51</sup> mẹ oshilọkpa Bakubuku;  
 mẹ oshilọkpa Hakufa;  
 mẹ oshilọkpa Hahuru;

- <sup>52</sup> mę oshilokpa Bazulutu;  
 mę oshilokpa Mehida;  
 mę oshilokpa Hasha;  
<sup>53</sup> mę oshilokpa Bakosu;  
 mę oshilokpa Sizera;  
 mę oshilokpa Tema;  
<sup>54</sup> mę oshilokpa Nezaya;  
 mę oshilokpa Hatifa.
- <sup>55</sup> A bya l'oshilokpa ndu  
 ojozi Sólomonu bę bụ:  
 Oshilokpa Sotayi;  
 mę oshilokpa Hasoferu;  
 mę oshilokpa Peruda;  
<sup>56</sup> mę oshilokpa Jiala;  
 mę oshilokpa Dakonu;  
 mę oshilokpa Gidelu;  
<sup>57</sup> mę oshilokpa Shefataya;  
 mę oshilokpa Hatilu;  
 mę oshilokpa  
 Pokeretu-Hazebayimu;  
 mę oshilokpa Ami.
- <sup>58</sup> Ndu anoduje eje ozi  
 l'eze-ulo Chileke  
 g'ephe ha; mę oshilokpa  
 ndu ojozi Sólomonu  
 bę dũ ukporo iri lę tete  
 l'umadzu iri l'ębo.
- <sup>59</sup> Waa ndu ophu shi lę mkpukpu Tęlu-Mela; mę lę  
 mkpukpu Tęlu-Hasha; mę lę mkpukpu Kerubu; mę lę  
 mkpukpu Adanu; mę lę mkpukpu Ima lwa bụ owana:  
 Ole ndu ono ta adudu ike goshi ipfu, ephe bụ; mę  
 oshilokpa onye ephe bụ; k'ophu ee-shi nno maru l'ephe  
 bũa ndu Izurelu. <sup>60</sup> Oshilokpa Delaya; mę oshilokpa



Tobaya; mę oshilokpa Nekoda bę dų ųnu l'ukporo iri l'ębo l'umadzu iri l'ębo.

<sup>61</sup> A bya l'oshilokpa ndu-uke Chileke: oshilokpa Habaya; mę oshilokpa Hakozu; mę oshilokpa Bazilayi; nwoke ono, luru nwada Bazilayi kę Giladu; a nodu ekuwa iya ro ępha ala l'ępha iya. <sup>62</sup> Ndu ono bę a choru ępha phę l'ękwo, e deru g'e gude nwushia phę; ęle a ta humaduru ępha phę l'ękwo ono. Oo ya bu; e wofu phę l'onodu ndu-uke Chileke mee phę ęphe buru ndu aaso nsọ. <sup>63</sup> Ochi-oha bya asu g'ęphe te tsojeshi ria nri, kakota adu nsọ jeye teke onye uke Chileke, e-gude Urimu; waa Tumimu kpata ishi l'ęka Chipfu.

<sup>64</sup> Mkpako ndu ono, lwaru nu ono g'ęphe ha dų ukporo ųnu ise l'unu ise l'ukporo iri l'ęsato;\* <sup>65</sup> a - gufukwa ndu-ozu phę unwoke; mę unwanyi. Ndu k'ono dų ųnu iri l'ęsato l'ukporo ishii l'umadzu iri l'ęsaa.† Epeh nwekwarupho ndu aguje ebvu, dų ukporo iri; unwanyi yęe unwoke.

<sup>66</sup> Inya phę dų ųnu l'ukporo iri l'ishii; l'inya iri l'ishii; inya-mulu phę dų ukporo iri l'ębo l'inya-mulu ise. <sup>67</sup> Inya-kamelu phę dų ųnu l'ukporo l'iri l'ise; nkapfu-igara dų ųnu iri l'ishii l'ukporo iri l'ishii.‡

<sup>68</sup> Epeh rwua l'ulo Chipfu lę Jierusalęmu; o duru ndu bugbaa ishi l'onu-ulo l'onu-ulo wotaru iphe, shi phę l'obu nu g'e gude kpukwaa ęlo Chileke ono g'ọ dų g'oshi dų. <sup>69</sup> Epeh meru g'ike phę beru woru mkpola-ododo, dų ukporo ųnu ugbo ęsaa; l'unu iri l'ębo; l'ukporo iri; nu g'e dobe l'ulo ęku, ee-gudeje jee ozi ono; bya anu mkpola-ochaa, dų ukporo ųnu ugbo ukporo l'iri lę nanu; l'unu ise; bya anufua uwe ndu-uke Chileke, dų ukporo ise.

---

\* 2:64 2:64 BU iya bu 42,360 lę mbekee. † 2:65 2:65 BU iya bu 7,337 lę mbekee. ‡ 2:67 2:67 BU iya bu nkapfu-igara dų 6,720 lę mbekee.

<sup>70</sup> Ndu uke Chileke; mę ndu Lívayi; mę ụphodu ndu ono; mę ndu agụje ebvu; mę ndu echeje ọnu-ọguzo nche; mę ndu anọduje eje ozi l'eze-ulo Chileke bę buchaa lę mkpụkpu nkephę. Ndu Ízuręlu g'ęphe ha bukwarụpho lę mkpụkpu nkephę.

### 3

#### *Aakpụkwa ọru-ngweja Chileke*

<sup>1</sup> O rwua l'ọnwa k'ęsaa; ndu Ízuręlu tụko g'ęphe ha gude obu lanụ dzukọbe lę Jierúsalemụ. Teke ono bę ndu Ízuręlu bukwatawaa lę mkpụkpu ęka ęphe shig-baa. <sup>2</sup> Tọbudu iya bụ; Jieshuwa, nwa Jiozadaku ęphe l'ụnwunna iya, bụ iya bụ ndu-uke Chileke; mę Zerúbabelu, nwa Sheyalutiyęlu ęphe l'ụnwunna nkiya wulihu kpụaha ọru-ngweja Chileke kę Ízuręlu; k'ọphu ęphe e-gwe ngweja-akpọ-ọku l'eli iya; g'e deru iya l'ękwo-ekemu Mosisu, bụ onye kę Chileke. <sup>3</sup> Ęphe kpụa ọru-ngweja ono l'eli ęka e shi tųhawa ọkpa iya; kęle ęphe atsụ ndu ono, bu l'alị ono ebvu; bya egweeru Chipfu ngweja-akpọ-ọku l'eli iya; mbụ ęphe gwee ngweja ono l'utsu mę l'ụzenyashi. <sup>4</sup> Ęphe bọkwapho Ọbo-Ìkpù; bọo ya g'e deru iya l'ękwo; bya egwee ngweja-akpọ-ọku, eegweje mbọku-mbọku l'ọbo-iphe ono. Ngweja ono bę ęphe gwerụ ugbo ole, ekemu iya sụru g'e gweje iya lę mbọku lę mbọku. <sup>5</sup> E mechaa; ęphe bya egweaha ngweja-akpọ-ọku ono, eegweje tekenteke ono; mę ngweja, eegweje l'ọbo ọnwa-afufu; mę ngweja ọzo, eegweje l'ọbo-iphe e dobegbaaru Chipfu iche; mękwapho ọphu onyemonye wotagbaaru iphe, ọ tųru obu iya onyo nụ Chipfu. <sup>6</sup> E -shi lę mbọku mbụ l'ọnwa k'ęsaa ono bę ęphe watarụ egwe ngweja-akpọ-ọku anụ Chipfu. Obenu l'e teke atụdu ọkpa eze-ulo Chipfu teke ono.

*Aakpukwa eze-ulo Chipfu*

<sup>7</sup> Eṗhe woru okpoga nṗ ndu akpṗje ṗlo; mṗ ndu kapyiṗta; woru nri; mṗ iphe-angṗngu; mṗ manṗ nṗ ndu Sayiṗdonu; mṗ ndu Taya k'Oṗhu eṗhe e-shi l'úbvú úbvú Lébanṗnu vufutaru phṗ oshi sida l'eze-ṗnyimu; mbṗ vufutaru phṗ iya lṗ Jiṗpa, bṗ iya bṗ gṗ Sayiṗrosu, bṗ eze ndu Peshiya kweru g'eṗhe vuta. <sup>8</sup> L'ṗnwa k'eṗo l'apha, kwe apha labṗ, eṗhe byarwutaru l'ṗlo Chileke lṗ Jierúsalemṗ bṗ Zerúbabelu, bṗ nwa Sheyalutiyṗlu; mṗ Jieshuwa, bṗ nwa Jiozadaku eṗhe l'ṗnwunna phṗ ndu oṗhuna, bṗ iya bṗ ndu-uke Chileke; mṗ ndu Lívayi; mṗwaro ndu ono, e shi kpṗa lṗ ndzṗ, bṗ ndu ono, lwarṗ Jierúsalemṗ ono bya atṗko g'eṗhe ha wata ozi ono. Eṗhe hoṗtagbaa ndu Lívayi, a -gbṗ lṗ ndu noṗwaru ṗkporo apha kwasṗru g'eṗhe bṗru ndu eleta ṗnya l'ozi, eeje l'eze-ṗlo Chipfu. <sup>9</sup> O bṗru Jieshuwa yṗe oshilṗkpa iya; mṗ abṗbu iya; mṗ Kadṗmelu yṗe oshilṗkpa iya, bṗ ṗnwu Jiuda bṗ bṗ ndu eleta ṗnya l'ozi, eeje l'ṗlo Chipfu; mṗkwapho oshilṗkpa Henadadu; mṗ ndu Lívayi, ṗnwu phṗ unwoke mṗ abṗbu phṗ.

<sup>10</sup> Ndu akpṗ eze-ṗlo Chipfu ono tṗepho ṗkpa iya; ndu-uke Chileke chṗta uwe uke phṗ yee; bya apagbaaru opu. Ndu Lívayi, bṗ ṗnwu Asafu gudegbaa nkwa fṗta; eṗhe wata aja Chipfu ajaja l'ṗzo, Dévidi, bṗ eze ndu Ízurṗlu tṗru phṗ ṗkpa iya. <sup>11</sup> Ebvṗ noṗdu ada; eṗhe tṗko ekwe iya ekwekwe aja Chipfu ajaja; ekele iya ekele asṗje: “O bṗ onye du ree.

N-yemobu iya l'anṗje  
 jasṗ lṗ tuutuutuu lṗ  
 mṗimiimii l'eṗhu  
 ndu Ízurṗlu.”

Ndu ono g'eṗhe ha tṗko tṗa oke ṗzu gude jaa Chipfu ajaja; kṗle a tṗru ṗkpa ṗlo Chipfu. <sup>12</sup> Oṗle ikpoto ndu-uke

Chileke; mę ndu Lívayi; mę ndu-ishi l'ipfu; mbu ndu ono buwaa ọgerenya ono, humahawaru ọlo kę mbu pho bę rarụ ẹkwa rashia ya ike g'ẹphe humaru g'aatu ọkpa ọlo ono. Igwerigwe nọdu aturo uzu ẹhu-utso atushi iya ike; <sup>13</sup>k'ophu bu lę ndiphe ta amadu ophu bu uzu ẹhu-utso; ọzo uzu-ẹkwa, ẹphe atu; kẹle uzu tukoerupho swokobe atu kę wowoowoo; a nọdu ụzenya anugbaa ya.

## 4

*Ndu akposhi g'a ta kpụ ọlo Chileke*

<sup>1</sup> Noo ya; ndu ohogu ndu Jiuda yee kę ndu Benjiaminu numaepfo lę ndu ono, e shi kpua lę ndzu ono akpuwa eze-ọlo Chipfu, bu Chileke kę Ízurẹlu; <sup>2</sup> ẹphe byapfuta Zerúbabelu; mę ndu-ishi l'ọnu-ọlo l'ọnu-ọlo bya asu phe: “G'anyi tsonuru unu yeta ẹka kpua ọlo ono; kẹle anyibedua abakwaru-a Chileke unu ẹja g'unubedua. Kẹle anyi shihawaa ụzenya gweta ngweja anu iya. Anyi shiro lę teke Esahadonu bu eze ndu Asiriya; mbu onye ono, duru anyi lwa ẹka-a ono gweta ngweja obu.”

<sup>3</sup> Obenu lę Zerúbabelu; mę Jieshuwa; mę ndu ọzo, bu ishi l'ọnu-ọlo l'ọnu-ọlo lę Ízurẹlu bę suru phe: “Ọ tọ dudu iphe, anyi l'unu jigba lę k'akpuru Chileke anyi ọlo. Ọo anyibedua nwẹkinyi anyi bę a-kpuru Chipfu, bu Chileke kę Ízurẹlu ọlo gę Sayirosu, bu eze ndu Peshiya tu-buru iya anyi.”

<sup>4</sup> Ọo ya bu; ndu ali ono mee ndu Jiu tsuahaa ebvu; ẹphe tu-gbee ẹka l'akpu ọlo ono. <sup>5</sup> Ndu ono je ebukoo ndu mkpaka g'ẹphe bya akposhia iphe, ẹphe tumberu k'ememe. Ẹphe shiepho teke Sayirosu, bu eze ndu Peshiya; kpakashita iphe, ẹphe eme gbiriri jasụ lę teke Dariyosu bu eze ndu Peshiya.

<sup>6</sup> O be teke Kuzakuseṣu bataru l'aba-eze; ndu Ọhogu ono dee ẹkwo gude epfu iphe, ẹphe sũru lẹ ndu bu lẹ mkpũkpũ Jiuda meru; mẹ ndu bu lẹ mkpũkpũ Jierúsalemũ.

<sup>7</sup> O be teke Atakuzakuseṣu bũ eze ndu Peshiya; Bishilamu; mẹ Mituredatu; mẹ Tabẹlu; waa ndu ọzo, ẹphe l'ẹphe aswiye; dee ẹkwo-ozì nũ iya. Ẹkwo-ozì ono bẹ e gude ẹka-ẹkwo ndu Arámu dee; Ọ bũkwarupho opfu-alì ndu Arámu bẹ e gude dee ya.

<sup>8</sup> Ọ bũru Rehumu, bũ nnajìoha; yẹ Shimushayi, bũ onye edeje ẹkwo bẹ deru ẹkwo-ozì ono nũ eze Atakuzakuseṣu gude pfubyishia ndu Jierúsalemũ. Iphe, ẹphe deru l'ẹkwo-ozì ono bũ:

<sup>9</sup> “Ẹkwo-ozì ọwa shi l'ẹka Rehumu, bũ nnajìoha; mẹ Shimushayi, bũ onye edeje ẹkwo; waa ndu ọzo, ẹphe l'ẹphe aswiye; mbũ ndu-ikpe; mẹ ndu eze; mẹ ndu-ishi ndu Peshiya; mẹ ndu-ishi ndu Ẹreku; mẹ ndu-ishi ndu Bábilonu; mẹ ndu-ishi ndu Susa, bũ iya bũ ndu Elamu; <sup>10</sup> mẹwaro iphe, bũ ọhamoha ono, parũ ẹka; bya enwegbaaru ẹnya ono, bũ ndu Ọsunapa chìshiru; ẹphe je ebugbaaru lẹ mkpũkpũ lẹ mkpũkpũ, dũ lẹ Samériya; mẹ l'ẹka ọzo, dũchaa l'azũ ẹnyimũ.”

<sup>11</sup> Waa iphe, e deru l'ime ẹkwo-ozì, ẹphe deru nũ Atakuzakuseṣu baa:

“Ẹkwo-ozì-a bẹ anyi ede anũ gũbe eze Atakuzakuseṣu.

“Ndu ede iya nũ bũ ndu-ozì ngu; mbũ anyìbe ndu ono, bu l'azũ ẹnyimũ:

<sup>12</sup> “Gẹ gũbe eze makwarũ lẹ ndu Jiu ono, bũ ndu shi ngu l'ẹka lwapfuta anyi-a bẹ jeshiwaru Jierúsalemũ. Ẹphe akpũkwawa mkpũkpũ ono, ekwefuje ike; bya abũkwarupho mkpũkpũ ẹjo-ememe ono. Ẹphe akpũphuwa igbulọ iya azũ; atũkwafuwa ọkpa iya. <sup>13</sup> Iphe ọzo bũ gẹ gũbe eze makwarũ l'a -kpũwa mkpũkpũ ono;

kpua igbulọ iya bẹ ẹphe ta tubaekwa utu ali ọzo; mẹ utu aswa; mẹ utu ọzo; shi nno mee g'uzo, okpoga shi erwu ndu eze ẹka rwuhu. <sup>14</sup> Eshi ọphu ọ bu l'ibe eze bẹ anyi shi eri nri; tẹme ọphu ọ dudu ree g'anyi huma ẹka eeme eze iphe-iphere meru iphe anyi ezi ozi g'eze maru; <sup>15</sup> k'ọphu bu l'e -nyochaa ẹkwo, nna unu pẹ deshuru iphe, meru nu; unu ahuma l'ime ẹkwo ono lẹ mkpukpu-a bu mkpukpu ekwefuje ike; emejekwapho g'iphe tsu ndu eze l'ehu; mẹ iphe, bukpo alì-eze alì-eze; mbu l'ẹjo-ememe ono bukpowaa iphe, ẹphe shi teke du ẹnya meta. Ọ buru iya meru iphe e mebyishuru mkpukpu ono. <sup>16</sup> Anyi eme gẹ gube eze maru l'a -kpua mkpukpu ono; bya akpua igbulọ iya bẹ ọ tọ dudu iphe, byaru e-shikwadu l'azu ẹnyimu erwu ngu ẹka ọzo.”

<sup>17</sup> Eze bya eyee ọnu sù:

“Mu ekele Rehumu, bu nnajioha ekele; bya ekelek-wapho Shimushayi, bu onye edeje ẹkwo; mẹ ndu ono, bu ndu ẹphe l'ẹphe aswije ono, bu lẹ Sameriya; mẹ ndu ọphu bu l'ẹka ọzo, du iche iche l'azu ẹnyimu azu iya ọphuu.

<sup>18</sup> “Ekwo-ozì, unu nuru anyi bẹ a gwaru gbanwee l'ataphu mu. <sup>19</sup> Mu bya atuwaa ekemu; a bya enyochawa huma lẹ mkpukpu-a te emejedu iphe, ndu eze pfuru e -shi teke ndiche; mẹ l'ẹphe ekwefuje ike; eme gẹ ndu ọzo ta anodujeshi eme iphe, ndu eze pfuru. <sup>20</sup> Tẹmanu; lẹ Jierusalẹmu shi nweru ndu eze, okpehu du; tẹme mkpukpu du igwerigwe shi nodu pẹ l'ẹka l'azu ẹnyimu. E shi anoduje aturu pẹ utu ali; mẹ utu aswa; mẹ utu ọzo. <sup>21</sup> Nta-a bu g'unu tua ekemu sù gẹ ndu ono te jehẹkwa ozi ono, ẹphe eje ono. G'ẹphe ta akpuekwa mkpukpu ono ọzo jasù teke mu a-sù g'a wata iya akpukpu. <sup>22</sup> Unu te ewekwa ozi ono gbẹgele gbẹgele;

l'a taa ahakwa iphe, emebyi iphe g'o vu evuvu eje; shi nno emekata ndu eze.”

<sup>23</sup> TỌbudu iya bụ; a gụepho iphe ono, eze, bụ Atakuzakuzesu deru l'ekwo-ozì ono, o deru nụ Rehumu; mę Shimushayi, bụ onye edeje ekwo; mę ndu ephe l'ephe aswije ono; ephe mekebe egwegwa jepfushia ndu Jiu ono, nọ lę Jierusalẹmu ono; je ekebuta phę k'ike; g'ephe te ejehę ozi ono, ephe eje ono.

<sup>24</sup> Noo ya; ozi ono, e gude l'ęka eje l'ụlo Chileke lę Jierusalẹmu ono; kwaa g'o jeberu; ophu e tee jehędu iya jeye o rwua l'apha, kwe Dariyosu, bụ eze ndu Peshiya apha labọ, o wataru aburu eze.

## 5

*Aakpuphu eze-ulo Chileke azu lę Jierusalẹmu*

<sup>1</sup> TỌbudu iya bụ; ndu mpfuchiru Chileke, bụ Hagayi yele Zekaraya nwa Ido bya awata epfu opfu Chileke nūaha ndu Jiu, bu lę Jierusalẹmu; mę l'alì ndu Jiuda; mbu l'ephe gude ephe Chileke kę ndu İzurelu, pfuaharu phę iya. <sup>2</sup> Oo ya bụ; Zerubabelu nwa Sheyalutiyelu; yele Jieshuwa, bụ nwa Jiozadaku wata akpu ulo Chileke ono; mbu ulo ophu du lę Jierusalẹmu. Ndu mpfuchiru Chileke tsokwaru phę phọ eyetaru phę ęka.

<sup>3</sup> O buru teke ono bę Tatenayi, bụ ochi-oha ndu bu l'azu ęnyimu; mę Sheta-Bozenayi yele ndu ephe l'ephe aswije wu-pfutaru phę bya asu phę: “?Bü onye karu unu g'unu kpua ulo-a dozia?” <sup>4</sup> Ephe jikwaa phę phọ su: “?Bü gunu bugbaa ephe ndu ono akpu ulo ono?”

<sup>5</sup> Ole Chileke bę nwuberu ndu bụ ogerenya ndu Jiu ono ęnya; k'ophu bụ lę ndu ono ta akposhiduru phę eje ozi, ephe eje; jeye teke opfu ono rwuru Dariyosu lę nchi; o dee ekwo-ozì nụ g'abya akarü phę onu ya yeru lę k'opfu ono.

<sup>6</sup> Qwaa bu iphe, e deru l'ekwo-ozu ono, Tatenayi, bu ochi-oha ndu bu l'azu enyimu deru; ye Sheta-Bozenayi; me ndu ephe l'ephe aswije, bu ndu no l'oke-okwa, bu l'azu enyimu; mbu ekwo-ozu ono, ephe deru nu eze Dariyosu. <sup>7</sup> Ekwo-ozu ono, ephe deru nu iya ono be e deru su:

Ekwo-ozu-a be anyi ede anu gube eze Dariyosu. Anyi ekele ngu ekele!

<sup>8</sup> Qwaa bu ge gube eze maru l'anyi jeru l'eka ndu Jiuda bu. Anyi jeshia l'ulo Chileke ono, bu onye paru eka ono; bya ahuma le ndu ono gudewaa mkpuma, ha shii akpu ulo ono; ephe zubechaa eze-itso l'ime igbulu ono. Ephe yeru ehul'ozu ono; o ndu eje egwegwa egwegwa l'eka phe.

<sup>9</sup> Anyi jia ndu ophu bu ogerenya ndu Jiuda ono su phe: “?Bu onye karu g'unu kpu ula ono dozia?” <sup>10</sup> Anyi bya ajikwaa phe pho ephe phe; k'ophu anyi e-de ephe phe ono edede nu ngu gi maru ndu-ishi ozu ono.

<sup>11</sup> Qwaa bu onu, ephe yeru anyi: “Anyi bu ndu-ozu ke Chileke, nwe igwe; nweru ali. Anyi akpukwa ulo ono, a kpuhawaru teke du enya ono; mbu ulo, onye eze ndu Izurelu ono, paru eka apaa ono kpuleru kputse ono. <sup>12</sup> O buru l'oo le nna anyi phe kpatsuru Chileke k'imigwe ehul'eghu meru g'o gude o woru phe ye l'eka Nebukadineza, bu eze ndu Babilonu; mbu onye Kaludiya ono, bu iya mebyishiru ulo-a bya achita ndu ali-a chiru lashia Babilonu. <sup>13</sup> O buru iya bu l'o rwua l'apha, kwe Sayirosu, bu eze ndu Babilonu apha lanu, o wataru aburu eze; o tua ekemu; mbu eze, bu Sayirosu g'a kpukwaa ulo Chileke ono. <sup>14</sup> Ivu, e meru le mkpola-ododo; me ndu ophu e meru le mkpola-ochaa dobe l'ulo Chileke, bu iya bu ono, Nebukadineza gwetajeru l'eze-ulo ono, du le Jierusalemu je edobe l'eze-ulo agwa ndu



Bábilõnu bẹ̀ bụ̀ eze bụ̀ Sayĩrosu ono l'onwiya jeru egweta iya l'eze-ulo agwa ndu Bábilõnu ono. Eze Sayĩrosu gweru ivu ono ye l'eka onye eekuje Sheshubaza; onye o meru ochi-oha; <sup>15</sup> bya asu iya: 'Gweta ivu-a gweru je edobe l'eze-ulo, du le Jierusalemu. Ozo bu g'a kpukwaa ulo Chileke g'o ndu-phu azu l'eka onohawa.' <sup>16</sup> Nokwa iya bu le Sheshubaza abya atua okpa ulo Chileke le Jierusalemu. Eshi teke ono bya eye nta-a be e shi kputa iya; ophu a kpu-gheduru iya."

<sup>17</sup> "Oo ya bu; o -buru l'o du gube eze ree; i haa g'a vochaada ulo eka aakwakobeje iphe ndu eze deru le Babilonu l'eka ono g'a maru; ?bua eviya l'eze, bu Sayirosu turu ekemu su g'a kpukwaa ulo Chileke, le Jierusalemu. Ge gube eze ezilatakwanuru anyi iphe, i chi-taru l'idzu l'obu ngu l'opfu-a."

## 6

*A choru ekemu, eze, bu Sayirosu turu chota*

<sup>1</sup> Tobudu iya bu; eze, bu Dariyosu bya atua ekemu; e tsoru ulo eka akwakobeje iphe vochaaha le Babilonu; mbu eka a kuberu ekwo, e deshuru iphe, meru l'ali ono. <sup>2</sup> O buru le mkpukpu Ekubatana, bu ishi mkpukpu ndu Midiya be a vofutaru ekwo, a phuru aphupu.

Iphe, e deru l'ekwo ono be suru:

<sup>3</sup> "L'apha ke mbu, Sayirosu wataru abu eze be o turu ekemu g'a kpu ulo Chileke ono, du le Jierusalemu; su g'a kpukwaa ulo ono, bu eka aanoduje egwe ngweja; mbu g'a tukwaa okpa iya atukwa. G'oo-habe l'eli aburu ntukpa ukporo eno l'iri; mgbureku iya adu ntukpa ukporo eno l'iri. <sup>4</sup> Aakpopfube iya mkpuma, ha shii uzi eto; aapfube iya itso lanu. Ugwo iya be ee-shi l'ulo eku ndu eze pfua. <sup>5</sup> Ozo bu; ivu, e meru le mkpola-ododo; me ke mkpola-ochaa, bu ophu Nebukadineza shi l'eze-ulo

ono, du le Jierúsalemu ono gweta je edobe le Bábilonu; g'e gwetakota iya je edobephu azu l'eka o shi du l'eze-ulo ono.

<sup>6</sup> “Oo ya bu ge gube Tatenayi, bu ochi-oha l'azu enyimu; me Sheta-Bozenayi; me ndu unu l'ephe aswije, bu ndu no l'oke-okwa tuko g'unu ha buru ubara yeru eka ono. <sup>7</sup> Ba adukwa g'unu ha onye e-je akposhi ozi ono, eeje l'ulo Chileke ono. Unu haa g'ochi-oha ndu Jiu; me ndu bu ogerenya ndu Jiu kpukwaa ulo Chileke ono g'o pfuru l'onodu iya. <sup>8</sup> Ozo bu le mu atu ekemu iphe, unu e-meru ndu bu ogerenya ndu Jiu ono g'ephe gude kpukwaa ulo Chileke ono su: G'a pfu-dzukotaje ndu ono ugwo, ephe gude eme k'ulo ono rengurengu. Eka ee-shi pfua phe iya bu l'ulo eku ndu eze; mbu shita l'utu, ndu bu l'azu enyimu turu; oo ya bu g'o to du iphe, a-kposhi ozi ono akposhi. <sup>9</sup> Iphe, bu iphe, mkpa iya duru phe; g'a nukwa phe iya; du g'unwu oke-eswi; me ebili; m'o bu nwaturu, ee-gude egwe ngweja-akpo-oku nu Chileke k'imigwe; me witi; me unu; me me; me manu; mbu egube ono, ndu-uke Chileke le Jierúsalemu sukpoerupho g'a nu phe be aa-nukotajekwa phe mboku-mboku; g'a ba hakwa phe iya anunu; <sup>10</sup> k'ophu ephe e-gwe ngweja, du ree nu Chileke k'imigwe; pfukwarupho nu iya g'o kebe eze l'oma; ye unwu iya.

<sup>11</sup> “Ozo bu le mu atukwapho ekemu su l'onye gbanweru opfu mu ono be aa-phota itso, gude ulo iya nanu; gude tsebe onye obu etsebe; teme l'e mee ulo iya obu g'o buru ikpozu. <sup>12</sup> Ge Chileke ono, bu iya hotaru eka ono g'o buru eka oo-buru eburu ono mebyikwaa iphe, bu ndu eze; waa iphe, bu ndu e-me g'ephe gbanwee opfu-a; ozoo machia eka g'ephe mebyia ulo Chileke-a, du le Jierúsalemu. Oo mbedua, bu eze, bu Dariyosu be turu

ekemu-a. G'unu doo ɛnya lɛ mini mee iphe, ekemu-a pfuru.”

*Eeye eze*-ɔlo Chileke ono l'ɛka Chileke

<sup>13</sup> Tɔbudu iya bu; Tatenayi, bu ɔchi-ɔha l'azu ɛnyimu; mɛ Sheta-Bozenayi; mɛ ndu ɛphe l'ɛphe aswije; bya emee iphe ono, eze, bu Dariyɔsu sɔru g'e mee ono ɛgwegwa. <sup>14</sup> Oo ya bu; ndu bu ɔgerenya ndu Jiu ono nɔdu akpu ɔlo ono eje l'iphu l'iphu shita l'opfu Chileke, Hagayi, bu onye mpfuchiru Chileke yɛle Zekaraya, bu nwa Ido epfu. ɛphe kpua ɔlo ono jasɔ ɛphe kpɔ-ghee ya ɔ du gɛ Chileke kɛ Ízurelu sɔru g'ɛphe kpua ya g'ɔ du; mɛ l'uzo Sayirosu; mɛ Dariyɔsu; mɛ Atakuzakuzɛsu, bu ndu eze Peshiya tɔru phɛ ekemu iya. <sup>15</sup> ɛphe kpua ɔlo ono kpɔ-ghee l'abali k'ɛto l'ime ɔnwa Ada; l'apha, kwe eze Dariyɔsu apha ishii, ɔ wataru aburu eze.

<sup>16</sup> Tɔbudu iya bu; ndu Ízurelu; mbu ndu-uke Chileke; mɛ ndu Lívayi; mɛwaro ndu ono, e shi kpua lɛ ndzu ono tuko g'ɛphe ha gude ɛhu-ɔtso, bɔo iphe; woru ɔlo ono ye Chileke l'ɛka. <sup>17</sup> ɛphe gude ukporo oke-eswi ise; mɛ ukporo ebili iri; mɛ unu unwu aturu gwee ngweja, ɛphe gude yee ɔlo Chileke ono l'ɛka Chileke. ɛphe gude mkpi iri l'ɛbo gwee ngweja-iphe-ɛji l'iswi ɛhu ndu Ízurelu l'ophu. Mkpi iri l'ɛbo ono nɔ-chiru ɛnya ipfu iri l'ɛbo, Ízurelu nweru. <sup>18</sup> ɛphe bya edobe ndu-uke Chileke l'ogiri l'ogiri; dobe ndu Lívayi l'ogbo l'ogbo phɛ g'ɛphe a-nɔdu eje ozi Chileke lɛ Jierúsalem; ɛgube e deru iya l'ɛkwo Mósisu.

Obo Ojeghata

<sup>19</sup> O rwua l'abali k'iri l'ɛno l'ime ɔnwa mbu; ndu ono, e shi kpua lɛ ndzu ono bɔo obo Ojeghata. <sup>20</sup> Ndu uke Chileke; mɛ ndu Lívayi bɛ a sachakɔtaru; ɛphe tuko g'ɛphe ha buru ndu mmerwu adudu l'ɛhu. Ndu Lívayi

gbua nwaturu obo Oje-aghata l'iswi ehu ndu ono, e shi kpua le ndzu ono; bya egbudoru iya unwunna phe ono, bu ndu-uke Chileke; bya egbudokwaru iya pho onwophe. <sup>21</sup> Oo ya bu; ndu Izurelu ono, e shi kpua le ndzu ono, lwaru nu ono tuko ria ya; mewaro ndu ono, woru onwophe dobe iche l'urwuali ono, ndu ta amadu Chileke l'ali ono emegbabe; shi nno abaru Chipfu, bu Chileke ke Izurelu eja. <sup>22</sup> Abali esaa be ephe gude ehu-utso boo Obo-iphe aataje buredi ekoduru ekoko; kele Chipfu be meru g'ehu tso phe utso shii; bya emee g'eze ndu Asiriya kporu obu yeru phe; k'ophu bu l'o meru g'eka shihu phe ike l'akpu ulo Chileke ono, bu Chileke ke Izurelu.

## 7

*Ndu Ezura du lwa Jierusalemu*

<sup>1</sup> Tobudu iya bu; abya anoo gbiriri jeye teke Atakuzakesu wataru abu eze ndu Peshiya; Ezura gbalihu alala. Ezura ono bu nwa Seraya; Seraya buru nwa Azariya; Azariya buru nwa Hilikaya; <sup>2</sup> Hilikaya buru nwa Shalumu; Shalumu buru nwa Zadoku; Zadoku buru nwa Ahitubu; <sup>3</sup> Ahitubu buru nwa Amaraya; Amariya buru nwa Azariya; Azariya buru nwa Merayotu; <sup>4</sup> Merayotu buru nwa Zerahaya; Zerahaya buru nwa Uzi; Uzi buru nwa Buki; <sup>5</sup> Buki buru nwa Abishuwa; Abishuwa buru nwa Finehasu; Finehasu buru nwa Eleyaza; Eleyaza buru nwa Eronu. Eronu buru onye-ishi ndu-uke Chileke.

<sup>6</sup> O buru Ezura ono gbalihuru shi le Babilonu lwatashia. Ezura ono bu onye ede ekwo; bya aburu onye k'ekemu Mosisu doru enya rengurengu; mbu ekemu, Chipfu, bu Chileke ke Izurelu turu. Eze mekotaru iya iphemiphe, o rworu iya g'o meeru iya; kele eka Chipfu, bu Chileke iya du iya l'ehu. <sup>7</sup> O dukwarupho

ndu Ízurẹlu, lwakwarupho Jierúsalemu teke ono; mbu l'apha, kwe eze, bu Atakuzakuzesu apha esaa, o wataru aburu eze. Ndu uke Chileke hakwarupho yiru iya; me ndu Lívayi; me ndu aguje ebvu; me ndu echeje onu-oguzo nche; me ndu eje ozi l'eze-ulo Chileke. <sup>8</sup> Ẹzura l'onwiya be jerwuru Jierúsalemu l'onwa k'ise, bukwapho apha, kwe eze apha esaa l'abu eze iya. <sup>9</sup> O shi le Babilonu gbeshi ije iya g'onwa mbu du l'abali mbu; rwua Jierúsalemu g'onwa ise du l'abali mbu; noo kele eka-oma ke Chipfu, bu Chileke iya be du iya l'ehu. <sup>10</sup> Noo kele Ẹzura be ziberu obu iya g'o nwuta ekemu Chipfu; mekwapho iphe, o pfuru; me g'o zia iphe, Chipfu toru okpa iya; me nsọ iya l'ali Ízurẹlu.

Ekwo-ozì, eze, bu Atakuzakuzesu deru nu Ẹzura

<sup>11</sup> Owaa bu iphe, e deru l'ekwo-ozì, eze, bu Atakuzakuzesu nuru Ẹzura, bu onye uke Chileke; buru onye edeje ekwo; mbu onye iphe, Chipfu turu l'ekemu; me iphe, o toru ndu Ízurẹlu okpa iya doru enya:

<sup>12</sup> “Ekwo-ozì-a be shi l'eka mube eze, bu Atakuzakuzesu, bu onye eze ka ndu eze. Onye mu ede iya anu bu Ẹzura, bu onye uke Chileke; buru onye edeje ekwo k'ekemu Chileke k'imigwe.

“Mu ekele ngu ekele.

<sup>13</sup> “Mu turu ekemu dee ya edede su l'iphe, bu onye Ízurẹlu, no l'ali-eze mu; mekpoo ndu-uke Chileke; me ndu Lívayi, bu onye oogu ala Jierúsalemu; g'onye obu tsokwaru ngu lashia. <sup>14</sup> Mube eze; me umadzu esaa, l'agbazjeru mu idzu be ezi unu g'unu je amaru g'onodu du le Jiuda; me le Jierúsalemu; unu amaru g'e gude emebe ekemu Chileke unu l'eka ono, bu iya bu ekemu ono, no unu l'eka ono. <sup>15</sup> Iphe ozo, unu e-mefua bu g'unu chita mkpola-ochaa; me mkpola-ododo ono,

mùbe eze; mẹ ndu ono, agbazijeru mu idzu ono gude obu anyi nù Chileke kẹ Ízurèlu; bụ onye ono, bu ebubu lẹ Jierúsalemu. <sup>16</sup> Unu achítafua mkpọla-ọchaa; mẹ mkpọla-ododo, unu a-nata lẹ Bábilọnu l'ophu yekọbe iya; mẹfua iphe ndu Ízurèlu; mẹ ndu-uke Chileke e-gude obu phẹ nù g'e gude mee k'ùlo Chileke phẹ ọbu lẹ Jierúsalemu.

<sup>17</sup> “Unu hụma l'unu gudefútaje okpoga ono zùta oke-eswi; mẹ ebili; mẹ nwatùru, unu e-gude gwee ngweja; yẹle ngweja-nri, etsoje iya nù; mẹ ngweja iphe-angungu, l'etsojekwa iya phọ. Unu e-gwe ngweja ono l'eli ẹnya ẹka eegweje ngweja l'ùlo Chileke unu lẹ Jierúsalemu. <sup>18</sup> A bya lẹ mkpọla-ọchaa; mẹ mkpọla-ododo ọphu phọduru nù; gẹ gùbe Ẹzura; mẹ ndu Jiu ọphuna gude iya mee iphe, dù unu ree l'ùzo, ọ bụ uche Chileke unu. <sup>19</sup> Iphemiphe, a nùkotaru unu g'unu gude jeje ozi l'ùlo Chileke unu ono bẹ unu e-gweshikọta dobe l'iphu Chileke lẹ Jierúsalemu. <sup>20</sup> Iphe ọzo, dù unu mkpa, bụ iphe unu ee-gude eme k'ùlo Chileke unu ono; ọ -bùru iphe, unu nùfutaje; unu eshi l'ùlo ẹku eze wota iya nù.

<sup>21</sup> “Nta bẹ mbẹdua, bụ eze Atakuzakuzẹsu atù ekemu ede iya edede anù iphe, bụ ndu akwakọbeje okpoga l'azù ẹnyimu azù iya ọphuu sù: Iphe, bụ iphe Ẹzura, bụ onye uke Chileke; bya abùru onye edeje ẹkwo k'ekemu Chileke k'imigwe sùru g'unu nù iya; unu nùjekwa iya iphe ọ bụ. <sup>22</sup> Je akpaa l'okpoga mkpọla-ọchaa, dù ụkporo ise; mẹ ogbongu witi, dù ụkporo ise; mẹ ite-mẹe, dù ụkporo ise; mẹ ekpemu manù, dù ụkporo ise; mẹ únú; ọle únú b'a ta sùdu l'ọ waa g'oo-jeberu. <sup>23</sup> Iphe, Chileke k'imigwe tùru l'ekemu; g'e mekwaa ya rengurengu; mbù iphe, a tùru l'ekemu g'e mee l'ùlo Chileke k'imigwe; a -nọnyanu oke ẹhu-eghu iya dapfuta alì-eze iya; yẹe k'ùnwu iya. <sup>24</sup> Ọzo bụ l'anyi emekwaphọ g'o doo unu ẹnya l'a dachiwaru

unu anata uto-ali; me uto-aswa; me uto-uzo l'eka ndu-uke Chileke; me l'eka ndu Livi; me l'eka ndu aguje ebvu; me l'eka ndu echeje onu-oguzo nche; me l'eka ndu eje ozi l'eze-ulo Chileke; me l'eka ndu ozo, ejekpo ozi l'ulo Chileke.

<sup>25</sup> “Ge gube Ẹzura gude mmamiphe, Chileke ngu nuru ngu gude hota ndu-ikpe; me ndu a-noduje edoshi opfu g'ephe kpeje ikpe, pfuru oto l'opfu ehu iphe, bukpo ndu bu l'azu enyimu; mbu iphe, bukpo ndu maru ekemu Chileke ngu. Unu eworu ekemu ono zia ndu amadu ekemu g'ephe maru iya. <sup>26</sup> Iphe, bu onye jikaru eme iphe, ekemu Chileke ngu pfuru; me iphe, ekemu eze pfuru; g'e kpee onye obu ikpe, shihuru ike; g'e kpee ya mpfugbu; ozoo l'achifu onye obu achifu; ozoo l'e gweta iphe, o nweru; ozoo l'a tua ya mkporo.”

Ẹzura etu Chileke epha

<sup>27</sup> G'ajaja buru ke Chipfu; mbu Chileke ke nna anyi phe; onye meru g'egube iphe owa du eze l'obu ke g'o mee g'ulo Chipfu ono, du le Jierusalemu buru eka du ubvu. <sup>28</sup> Yebe onye meru ge n-yemobu eze; me ke ndu anoduje agbaziru eze idzu rwube mu eka; me n-yemobu ke ndu bukpo ndu ike du, bu ndu-ozu eze. Obu be shihuru mu ike shii; noo kele eka Chileke be du mu l'ehu. O buru iya meru g'o gude mu du ike chikota ndu-ishi le izurelu; epe tsoru mu; anyi lashia.

## 8

Ẹpha ndu epe le Ẹzura swi lwa

<sup>1</sup> Qwaa bu epha ndu bugbaa ishi l'onu-ulo nna phe; temanu owa-a buru ekwo, e deshuru epha phe g'e gude nwua phe; mbu ndu ono, mu l'ephe shi le Babilonu swiru lwa teke Atakuzakuzesu bu eze:

- <sup>2</sup> Onye-ishi ndu oshilokpa  
 Finehasu bu Geshomu.  
 Onye-ishi ndu oshilokpa  
 Itama buru Danelu.  
 Onye-ishi ndu Nwa Dévidi  
 buru Hatushi,  
<sup>3</sup> bu nwa Shekanaya.  
 Onye-ishi ndu oshilokpa  
 Paroshi bu Zekaraya.  
 Ndu ephe l'iya swi,  
 bukwanu ndu e deru l'ekwo,  
 e deshiru g'e gude nwua phe  
 du unwoke ukporo esaa l'iri.
- <sup>4</sup> Onye-ishi ndu oshilokpa  
 Pahatu-Mówabu bu  
 Eliyowenayi nwa Zerahaya.  
 Ndu ephe l'iya swi du  
 unwoke ukporo iri.
- <sup>5</sup> Onye-ishi ndu oshilokpa  
 Zatu bu Shekanaya nwa  
 Jiahaziyelu. Ndu ephe l'iya  
 swi du unwoke ukporo  
 iri l'ise.
- <sup>6</sup> Onye-ishi ndu oshilokpa  
 Adinu bu Ebedu nwa  
 Jionatanu. Ndu ephe l'iya  
 swi du unwoke ukporo  
 labo l'iri.
- <sup>7</sup> Onye-ishi ndu oshilokpa  
 Elamu bu Jieshaya nwa  
 Atalaya. Ndu ephe l'iya  
 swi du unwoke ukporo  
 eto l'iri.



- <sup>8</sup> Onye-ishi ndu oshilokpa  
 Shefataya bu Zebadaya  
 nwa Mayikelu. Ndu ephe  
 l'iya swi du unwoke  
 ukporo eno.
- <sup>9</sup> Onye-ishi ndu oshilokpa  
 Jiowabu bu Obedaya nwa  
 Jiehiyelu. Ndu ephe l'iya  
 swi du unwoke ukporo iri  
 l'unwoke iri l'esato.
- <sup>10</sup> Onye-ishi ndu oshilokpa  
 Bani bu Shelomiti nwa  
 Jiosifaya. Ndu ephe l'iya  
 swi du unwoke ukporo  
 esato.
- <sup>11</sup> Onye-ishi ndu oshilokpa  
 Bebaya bu Zekaraya nwa  
 Bebaya. Ndu ephe l'iya swi  
 du unwoke ukporo l'esato.
- <sup>12</sup> Onye-ishi ndu oshilokpa  
 Azugadu bu Jiohananu  
 nwa Hakatanu. Ndu ephe  
 l'iya swi du unwoke ukporo  
 ise l'unwoke iri.
- <sup>13</sup> Onye-ishi ndu oshilokpa  
 Adonikamu be bu phe  
 byakpechaaru azu. Epha  
 phe bu Elifeletu; me Jiyuwelu;  
 me Shemaya. Ndu ephe l'ephe  
 swi du unwoke ukporo eto.
- <sup>14</sup> Onye-ishi ndu shilokpa  
 Biguvayi bu Utayi; me  
 Zaku. Ndu ephe l'ephe swi

dụ unwoke ụkporo ẹto  
l'unwoke iri.

Ezura Achọ ndu a-nọdu eje ozi l'eze ụlo Chileke

<sup>15</sup> Mu bya achikobe phẹ l'aguga ẹnnyimu ono, l'asọ ala Ahava. Anyi kpọbe ụlo-ekwa anyi l'ẹka ono nọo ujiku ẹto. Mu bya elekọta ẹnnya ẹ ndu ono g'ẹphe ha; mẹ ndu-uke Chileke; hụma l'ọ tọ dudu m'onye Lívayi, nọ l'ẹka ono. <sup>16</sup> Tọbudu iya bụ; mu zia g'e je ekua Eliyéza; mẹ Ariyelu; mẹ Shemaya; mẹ Ẹlunatanu; mẹ Jiaribu; mẹ Ẹlunatanu; mẹ Nétanu; mẹ Zekaraya; mẹ Meshulamu, bụ ndu-ishi. Mu kukwaphọ Jioyaribu; mẹ Ẹlunatanu, bụ ndu iphe edoje ẹnnya. <sup>17</sup> Ọ bụru Ido, bụ onye-ishi phẹ ẹ mkpụkpu Kasifiya bẹ mu ziru phẹ g'ẹphe jepfu. Mu karu phẹ iphe, ẹphe e-pfuru Ido; mẹ ndu nkiya phẹ; mbụ ndu ono, l'eje ozi l'eze-ulo, dụ ẹ Kasifiya l'ẹka ono; g'ẹphe zia ndu a-byapfuta anyi bya eje ozi l'ulo Chileke anyi.

<sup>18</sup> Ọ bụru l'ọo ẹ Chileke doberu anyi ẹka ọma iya l'ẹhu meru g'o gude ẹphe dutaru anyi onye iphe edoje ẹnnya; mbụ oshilọkpa Mahuli, ẹpha iya bụ Sherebaya. Mahuli bụ nwa Lívayi; Lívayi bụru nwa kẹ Ízurelu. Ụnwu Sherabaya; mẹ ndibe phẹ bẹ dụ iri l'esato. <sup>19</sup> Ndu ọzo bụ Hashabaya; mẹ Jieshaya, bụ oshilọkpa Merari. Ndibe phẹ mẹ unwune iya k'unwoke bẹ dụ ụkporo. <sup>20</sup> Ndu ọzo, ẹphe dutafuaru ẹ ndu eje ozi l'eze-ulo ono dụ ụkporo iri ẹ nanu. Ndu ono bụ ndu Dévidi; yele ndu-ishi ozi iya họtaru g'ẹphe yetajeru ndu Lívayi ẹka. Ndu ono g'ẹphe ha bẹ e deshikọtaru ẹpha phẹ l'ekwo.

Aswị ẹgu ẹpfu anu Chileke

<sup>21</sup> Tọbudu iya bụ; mu bya araa ya arara sụ g'a swia ẹgu l'ẹka ono; mbụ l'ẹnnyimu Ahava ono. K'ọphu anyi e-shi nno wozeta onwanyi alị l'ataphu Chileke anyi; rwọo ya g'o duru anyi l'ụnwegirima anyi; mẹ ivu anyi shia ụzo

ophu ka ree. <sup>22</sup> Kele iphere du mu ke ge mu jepfu eze je arwo ya g'o yeru anyi ikpoto ndu ojogu; me ndu agba l'inya g'ephe dua anyi l'uzo m'obvu ndu ohogu. Eshi ophu anyi gudewaa onu anyi su eze: "Eka-oma Chileke anyi be aduje l'ehu ndu bukpo, ndu ach o iya nu g'ee-shi g'o duru phe le ree. Ole okpehu iya; me oke ehueghu iya be aduje l'ehu iphemiphe bu ndu jikaru iya nu." <sup>23</sup> Oo ya bu; anyi swia egu rwo Chileke anyi k'iphe ono. O meeru anyi iphe, anyi suru g'o meeru anyi.

*Iphe, a nuru g'e gude mee iphe l'eze-ulo Chileke*

<sup>24</sup> Tobudu iya bu; mu woru umadzu iri l'ebo pho, bu ndu-ishi ndu-ishi-uke Chileke dobe iche; mbu Sherebaya; me Hashabaya; mewaro ndibe phe umadzu iri ophuna. <sup>25</sup> Mu bya atukota erwa mkpola-ochaa; me mkpola-ododo; me ivu; mekpoo iphemiphe, ndu eze; me ndu-uke Chileke; me ndu l'agbazijeru eze idzu; me ndu o meru ishi; me ndu Izurelu l'ophu, no l'eka ono nuru g'e gude eje ozi l'ulo Chileke. <sup>26</sup> Mu tua erwa iphe ono goshi phe. Iphe, erwa mkpola-ochaa du buru unu talentu l'ukporo talentu iri l'ebo le talentu iri; ivu, e meru le mkpola-ochaa be erwa iya du ukporo talentu ise. Erwa ke mkpola-ododo du ukporo talentu ise. <sup>27</sup> Iphe ozo bu gbamugbamu, e meru le mkpola-ododo, dataru unu dariku labo l'ukporo iri; me ivu labo, e meru l'okpobe onyirubvu, eke ododo ododo, vukwapho onu aswa ge ke mkpola-ododo.

<sup>28</sup> Mu su phe: Unu duru Chipfu nsu; onokwapho g'ivu-a g'o ha dukotaru iya nsu bu ono. Mkpola-ochaa; me mkpola-ododo ono bu iphe, ndiphe turu obu phe onyo nu Chipfu, bu Chileke ke nna unu phe. <sup>29</sup> Unu letakwa

phẹ ẹnya ree jeye teke unu a-tụ ẹrwa iya l'atatiḡhu ndu-ishi ndu-uke Chileke; mẹ ndu-ishi ndu Lívayi; mẹ ndu-ishi l'ọnu-ulo nna phẹ ẹ ́zuruẹlu. Ọ bụru l'ime mkpuru, dūchaa l'ulo Chileke ẹ Jierúsalemụ bẹ unu a-nọdu tụa ẹrwa iphe ono goshi phẹ. <sup>30</sup> Ọo ya bụ; ndu-uke Chileke chịta mkpọla-ọchaa ono; mẹ mkpọla-ododo ono; mẹ ivu ono, a tūwaru ẹrwa iya atutu ono; gude jeshia l'ulo Chileke anyi ẹ Jierúsalemụ.

<sup>31</sup> Tọbudu iya bụ; o rwua g'ọnwa mbụ dū l'abalị iri l'ẹbo; anyi shi l'enyimu Ahava gbalihu jeshia Jierúsalemụ. Ẹka Chileke anyi dū anyi l'ẹhu; o shi nno nafuta anyi l'ẹka ndu ọhogu; mẹ l'ẹka ndu ana nfu, kwakachaa anyi l'uzo. <sup>32</sup> Anyi rwua Jierúsalemụ bya anọo ujiku ẹto l'ẹka ono. <sup>33</sup> O be mbọku k'eno iya; anyi nọdu l'ulo Chileke tụa ẹrwa mkpọla-ọchaa; mẹ mkpọla-ododo; mẹ ivu ọzo, dū nsọ; woru ye l'ẹka Meremotu, bụ nwa Uráya, bụ onye uke Chileke. Eleyaza nwa Finehasu bẹ yẹ ya nọgbabe. Ndu tso phẹ nọdu l'ẹka ono bụ ndu Lívayi; mẹ Jiozabadu nwa Jieshuwa; mẹ Nowadaya nwa Binuyi. <sup>34</sup> Iphemiphe ono bẹ a guru ọgu; tụa ẹrwa iya atutu; bya edeshikọta ẹrwa iya ono l'ẹkwo teke ono.

<sup>35</sup> Ọzo bụ ẹ ndu ono, e shi kpua ẹ ndzụ ono; mbụ ndu ono, shi l'ẹka ono, e shi kpua phẹ ẹ ndzụ lwa ono bẹ gweru ngweja-akpọ-ọku nū Chileke kẹ ́zuruẹlu. Ẹphe gburu oke-eswi iri l'ẹbo l'ẹhu ndu ́zuruẹlu l'ophu; gbua ebili ụkporo ẹno l'iri l'ishii; mẹ unwu aturu ụkporo ẹto l'iri l'esaa; bya egbua mkpi iri l'ẹbo, e gude gwee ngweja-iphe-ẹji. Ngweja ono g'ọ ha bẹ a kpọkotaru ọku nū Chipfu. <sup>36</sup> Ẹphe zia ozi ono, eze ziru ndu nọ-chiru ẹnya eze; mẹ ndu bụ ọchi-ọha; l'azụ enyimu azụ iya ọphuu. Ndu ono bya eyeru ndu Jiu ono ẹka; yetakwaphọ ẹka l'akpụ ulo Chileke ono.

## 9

Ezura epfu anu Chileke ke ndu Jiu, alu nwanyi eghirigha

<sup>1</sup> E mechaepho iphemiphe ono; ndu-ishi byapfutashia mu bya asu mu: “Ndu Izurelu je akpaa le ndu-uke Chileke; me ndu Liviayi be jikakwaru edobe onwophe iche l'eka ndu ali-a no; ephe tsoakwaru eyephe eka l'akpamara, ndu ali-a l'anoduje emegbabe; mbu ndu Kenuanu; me ndu Hetu; me ndu Perezu; me Jiebusu; me ndu Amonu; me ndu Mowabu; me ndu Ijiputu; me ndu Amoru. <sup>2</sup> Ephe watawaru aluta unwada ndu ali-a k'onwophe; bya alutakwaru phe pho unwu phe; k'ophu bu le ndu ono, du nso ono be wotawaru onwophe tugbabe l'ehu ndu ali-a. O buru ndu-ishi; me iphe, bu ndu no l'oke okwa be eka phe kangoru l'eme ejo-iphe ono.” <sup>3</sup> Mu numaepho iphe ono; mu lajashia uwe mu; lajashia uwe mgbalanu mu; mu pheta onwomu egbushi l'ishi; pheta eji l'agba; bya anozeta anoo; edzu nodu eswi mu l'ehu. <sup>4</sup> Tobudu iya bu; iphe, bukpuo ndu ndzu guhuru l'eka ephe numaru opfu, o pfuru mbu Chileke ke Izurelu le k'emeswe ono, ndu ono, a kpuru le ndzu pho, lwaru nu pho mesweru ono; bya egbuphe mu mgburugburu; mu nodu ge mu no jeye teke eegweje eja uzenyashi; edzu nodu eswie mu pho l'ehu.

<sup>5</sup> O beepho l'egwe eja uzenyashi ono; mu shi l'enyoru, mu gworu gbalihu; yele uwe mu pho, mu lajashiru pho; me uwe mgbalanu mu pho, mu lajashiru pho; bya ephureta gbushi ikpere l'ali chiliaru Chipfu, bu Chileke mu eka mu labo imeli; <sup>6</sup> pfuru nu iya su: “Gube Chileke nkemu; iphere du mu; teme ehuru rwuhukwa mu pho ge mu e-shi palia enya lee gube Chileke mu; iphe, kparu iya nu buru l'ejo-iphe, anyi eme be kawa anyi l'eli; temanu

ikpe, nmaru anyi rwuwaa imigwe. <sup>7</sup> E-shi teke nna anyi phe no; rwua ntanu-a be ikpe, paru eka nmaakwaru anyi. O buru ejo-iphe, anyi emegbabe be meru g'o gude e woru anyibedua; me ndu eze anyi phe; me ndu-uke Chileke anyi phe ye ndu eze ndu ali-a l'eka ephe gude ogu-echi gbushia anyi; kpukoo anyi le ndzu; kwaa iphe anyi l'okwata; ephe ndu eme anyi iphe-iphere egube ono, ephe eme iya anyi ntanu-a. <sup>8</sup> Ole ke nwanta be gube Chipfu, bu Chileke mewaru anyi iphe-oma; kele i meru anyi nweru nwa ndu ophu, phoduru nu; bya emee g'anyi nguru anguru l'eka-a, duru ngu ns-o-a; k'ophu bu le gube Chileke anyi e-me g'enya sahu anyi; bya emekwapho g'anyi shi l'abu ohu, anyi bu-a jakerehu. <sup>9</sup> Anyi shi buru ndu ohu; ole gube Chileke ta ahaduru anyi g'anyi kwawaroo ya l'abu ohu ono. I goshiru l'iphuru anyi obu-imemini l'ataphu ndu eze ndu Peshiya; i meru anyi jakerehu; shi nno mee g'anyi kpukwaaru gube Chileke anyi ulo ngu; me g'anyi kpukwachaa eka o mebyishihuru; teme i mee g'anyi nweru igbulo le Jiuda me le Jierusalemu.

<sup>10</sup> “Gube Chileke anyi; ?bu gunu be anyi e-pfu me e -mechaa; kele anyi gwobewaru eme ekemu ngu ono. <sup>11</sup> Mbụ ekemu ono, i turu shita l'eka ndu-ozu ngu ono, bu ndu mpfuchiru su: ‘Ali ono, unu eje eburu ono be bu ali, ndu bu iya nu pharwushiru apharwushi. O buru akpamara, ephe eme; yele ahuma ahuma be jiru ali ono shita l'ishi iya lanu rwua l'ishi iya ophuu. <sup>12</sup> Oo ya bu; g'unu b'e wokwaru unwada unu kee unwu phe unwoke; ophu unu alutakwa unwada nkephe duru nu unwu unu unwoke. Unu l'ephe ba anodukwa le nchi-adu-doo; ozoo g'unu choo iphe a-ndu ejehuru phe nu; k'ophu unu e-shihu ike; ria iphe-oma, shi l'ali ono; unu eme g'o buru okiphe unwu unu jasuru l'ojejeje ono.’ <sup>13</sup> Iphe, nwuru

anyi b̄uru l'ẹjo-iphe, anyi meru; m̄ẹ l'ikpe, nmaru anyi ono b̄ẹ o shi. Ọle iphe, d̄u ẹji, anyi meru b̄ẹ ka shii eme l'ah̄h̄h̄ ḡb̄e Chileke anyi h̄uru anyi; t̄emanu i mee g'anyi nweru nwa ndu ọwana, ph̄oduru n̄u-a. <sup>14</sup> Ọ gbaru g'anyi mebyibaa ekemu ngu ọzo; k̄ẹ g'anyi l̄ẹ ndu ono, eme akpamara ono kegbaj̄eru nwanȳi ọzo? Anyi te emedu ẹhu eghua ngu eghu ghumihi k'ọphu ii-me anyi alak̄ota l'iyi k'ọphu ọ t̄o d̄ūedu onye aph̄odu n̄u; ọphu ọ d̄ūedu onye anah̄u n̄u? <sup>15</sup> Ḡb̄e Chipfu, b̄u Chileke k̄ẹ Ízur̄ẹlu; ì b̄u onye p̄f̄uberekoto; k̄ẹle anyi nweru nwa ndu ọphu ph̄oduru n̄u ntan̄u-a; mb̄u nwa ndu ọphu nah̄uru n̄u. Huma g'anyi p̄f̄uru l'iphu ngu b̄uru ndu-ikpe nmaru; mb̄u l'o meru ọphu ọ t̄o d̄ūdu onye a-d̄u ike p̄f̄uru l'ataphu ngu.”

## 10

### *Ndu Jiu ak̄oshiru Chileke iphe-ẹji ph̄ẹ*

<sup>1</sup> Ḡẹ Ẹzura epfu an̄u Chileke; ak̄oshiru Chileke iphe, d̄u ẹji, ẹphe megbab̄eru; ara ẹkwa; echi onwiya gbaagbaa l'al̄i l'ataphu ọlo Chileke; ndu Ízur̄ẹlu zef̄uta igwerigwe w̄u-pfuta iya; unwoke; m̄ẹ ẃnwanyi; m̄ẹ ẃnwegirima; ẹphebedua n̄odu arakwaph̄o ẹkwa nkeph̄ẹ arash̄i iya ike. <sup>2</sup> Shekanaya, b̄u nwa Jiehiȳẹlu; onye lan̄u l'ime ndu shi l'eri Elamu bya epfuru n̄u Ẹzura s̄u iya: “Anyi meakwaru ḡẹ Chileke anyi te egudeh̄ẹ ire anyi ẹka; noo k̄ẹle anyi jeru je al̄ushia ẃnwanyi ndu ọh̄ozo; mb̄u ẃnwanyi ndu al̄i-a. Ọle g'ọ d̄uhabe b̄ẹ ndu Ízur̄ẹlu d̄ulekwarua iphe, ẹphe a-n̄odu ele ẹnya iya. <sup>3</sup> Ọo ya b̄u; g'anyi l̄ẹ Chileke anyi gbanaa ndz̄u; l'anyi l'a-ch̄ishikota ẃnwanyi ono, anyi l̄ushiru ono; m̄ẹ ẃnwegirima, ẹphe nw̄ushiru, b̄u iya b̄u ẹgube ono nnaj̄iuphu mu ch̄iru idzu iya; m̄ẹ ndu ono, an̄oduje ats̄u ekemu Chileke anyi ebvu

ono. Ozo bu l'anyi e-me iya g'ekemu pfuru. <sup>4</sup> Gbalihu; o kwa ngu be opfu-a du l'eka; anyibedua be aa-pfukwaru ngu-a l'azu. Shihu obu ike mee ya.”

<sup>5</sup> Oo ya bu; Ezura gbalihu; bya emee ge ndu-ishi ndu-uke Chileke; me ndu Lívayi; me ndu Ízurèlu l'opfu ribua nte l'ephe e-me iphe ono g'e pfuru iya. Ephe tuko g'ephe ha ria nte ono. <sup>6</sup> Noo ya; Ezura bya alufu l'ataphu ulo Chileke ono; tugbua o buru iya eje l'ulo Jiehohananu nwa Elyashibu. Orwua eka ono; o jika eri nri; jika angu mini; kele ogukwadu aphu le ndu ono, e shi kpu le ndu ono be te gudedu ire phe eka.

<sup>7</sup> A bya atuko Jiuda; me Jierusalemu l'opfu raa ya arara ge ndu ono, e shi kpu le ndu ono tuko dzukota le Jierusalemu. <sup>8</sup> L'iphe, bu onye ta abyaduru l'ime abali eto iya be ee-gwe ivu iya; chifu onye obu g'o bo yihe l'ogbo, e shi kpu le ndu. O buru ge ndu-ishi; me ndu bu ogerenya chiru idzu iya bu ono.

<sup>9</sup> Tobudu iya bu; unwoke ndu Jiuda me ndu ke Benjaminu tuko g'ephe ha dzukota le Jierusalemu l'ime abali eto ono. Mboku ono bu mboku onwa ke tete du l'ukporo abali. Ndu ono g'ephe ha nodugbaa l'oma etsuzo l'ataphu ulo Chileke l'eka ono. Iphe ono; yee eze mini ono, edze nu ono mee; ehu nodu etegbaa phe etete. <sup>10</sup> Ezura, bu onye uke Chileke gbalihu su phe: “Unu mewaru; ophu egudedu ire unu eka; kele unu lushiru unwanyi ndu ohozo; shi nno mee g'ikpe kaba anma unube ndu Ízurèlu. <sup>11</sup> Oo ya bu; unu tuko iphe-aji, unu meru koshiaru Chipfu, bu Chileke ke nna unu phe; unu awata eme iphe, du iya ree. Unu bufu onwunu l'eka ndu ali-a no; me l'eka unwanyi ndu ohozo ono, unu lushiru ono no.”

<sup>12</sup> Ndu ono, dzukoberu l'eka ono tua uzu su: “O kpoephe iphe, i pfuru be anyi e-me. <sup>13</sup> Obenu le ndu



kuru l'eka-a paru igwerigwe; teme o buru udzumini; k'ophu anyi taa apfukotaduru l'etezi. Ozo bu l'iphe-a ta abudu iphe, ee-mekota ujiku lanu; ozoo ujiku labo; noo kele iphe ono mewaru anyi meswewa shingushingu. <sup>14</sup>Ge ndu-ishi igwe-oha-a pfunuru; g'iphe, bukpo ndu ndu- anyi le mkpukpu le mkpukpu, bu ndu luru unwanyi ndu ohozo; byakota l'iphu phe; g'ephe byaje mboku, a suru g'ephe bya. Ephe -nodu abya; ephe le ndu ogerenya le mkpukpu le mkpukpu aswijeru; mekwapho ndu-ikpe; jeye teke Chileke e-wofu oke ehu-eghu iya ono, l'enwu g'oku l'ehu anyi ono.” <sup>15</sup>O buerupho Jionatanu nwa Asahelu; yele Jiazaya nwa Tikuva kpoloko be bu ndu jikaru iphe ono, e pfuru ono. Meshulamu; me Shabetayi nodu agba eyeru phe.

<sup>16</sup>Ndu ono, e shi kpu le ndu ono, lwaru nu ono mee iphe ono, e pfuru ono. Ezura, bu onye uke Chileke hota unwoke, bu ndu-ishi l'onu-ulo nna phe; deshia epa phe l'ekwo. O hota phe g'onu-ulo phe hakota. O beepho l'abali mbu l'onwa k'iri; ephe nodu pfushia opfu ono. <sup>17</sup>O buru g'onwa ke mbu du l'abali mbu be ephe pfugheru opfu ehu ndu ono, luru unwanyi ndu ohozo ono.

*Unwoke, luru unwanyi ndu ohozo*

<sup>18</sup>A -bya l'echilabo ndu-uke Chileke be bu ndu owa- a luru unwanyi ndu ohozo ono: Ndu shi l'eri Jieshuwa nwa Jiozadaku; yee unwune iya ke nwoke, luru unwanyi ndu ohozo ono bu: Maseya; me Eliyaza; me Jiaribu; me Gedalaya. <sup>19</sup>Ndu ono g'ephe ha be tukoru kweta ukwe l'ephe a-chishikota unyomu phe ono, ephe luru l'ohozo ono. Onyenonu l'ime phe shi l'igwe-aturu iya kputa ebili lanu nu g'e gude gwee ngweja-apfu-ugwo.

<sup>20</sup>Ndu shi l'eri Ima, luru phe nu bu: Hanani; me Zebadaya.

<sup>21</sup> Ndu shi l'eri Harimu, luru phẹ nụ bụ: Maseya; mẹ Elayijia; mẹ Shemaya; mẹ Jiehiyẹlu; mẹ Uzaya.

<sup>22</sup> Ndu shi l'eri Pasho, luru phẹ nụ bụ: Eliyowenayi; mẹ Maseya; mẹ Ishimẹlu; mẹ Netanẹlu; mẹ Jiozabadu; mẹ Eleyasa.

<sup>23</sup> A bya lẹ ndu Lívayi; ndu luru ụnwanyi ndu ọhozo bụ: Jiozabadu; mẹ Shimeyi; mẹ Kelaya, bụkwapho onye eekuje Kelita; mẹ Petahaya; mẹ Jiuda; mẹ Eliyéza.

<sup>24</sup> A bya lẹ ndu agụje ebvu bẹ bụ Elyashibu bụ onye luru nwanyi ndu ọhozo.

Lẹ ndu nche-ọnu-oguzo bụru Shalumu; mẹ Tẹlemu; mẹ Uri bụ ndu luru ụnwanyi ndu ọhozo.

<sup>25</sup> A bya lẹ ndu Ízurẹlu ọzo, luru ụnwanyi ọhozo ono:

Ndu shi l'eri Paroshi, luru phẹ nụ bụ: Ramaya; mẹ Izaya; mẹ Malukayijia; mẹ Mijiaminu; mẹ Eleyaza; mẹ Hashabaya; mẹ Benaya.

<sup>26</sup> Ndu shi l'eri Elamu, luru phẹ nụ bụ: Matanaya; mẹ Zekaraya; mẹ Jiehiyẹlu; mẹ Abudi; mẹ Jieremotu; mẹ Elayijia.

<sup>27</sup> Ndu shi l'eri Zatu, luru phẹ nụ bụ: Eliyowenayi; mẹ Elyashibu; mẹ Matanaya; mẹ Jieremotu; mẹ Zabadu; mẹ Azayiza.

<sup>28</sup> Ndu shi l'eri Bebayi, luru phẹ nụ bụ: Jiehohananu; mẹ Hananaya; mẹ Zabayi; mẹ Atụlayi.

<sup>29</sup> Ndu shi l'eri Bani, luru phẹ nụ bụ: Meshulamu; mẹ Maluku; mẹ Adaya; mẹ Jiashubu; mẹ Sheyalu; mẹ Jieremotu.

<sup>30</sup> Ndu shi l'eri Pahatu Mówabu, luru phẹ nụ bụ: Aduna; mẹ Kelalu; mẹ Benaya; mẹ Maseya; mẹ Matanaya; mẹ Bezalẹlu; mẹ Binuyi; mẹ Manáse.

<sup>31</sup> Ndu shi l'eri Harimu, luru phẹ nụ bụ: Eliyéza; mẹ Ishaya; mẹ Malukayijia; mẹ Shemaya; mẹ Simiyonu;

<sup>32</sup> mẹ Benjiaminu; mẹ Maluku; mẹ Shemaraya.

<sup>33</sup> Ndu shi l'eri Hashumu, luru phe nu bu: Matenayi; me Matata; me Zabadu; me Elifeletu; me Jieremayi; me Manase; me Shimeyi.

<sup>34</sup> Ndu shi l'eri Bani, luru phe nu bu: Madayi; me Amuramu; me Uwelu; <sup>35</sup> me Benaya; me Bedeya; me Keluhi; <sup>36</sup> me Vanaya; me Meremotu; me Eliyashibu; <sup>37</sup> me Matanaya; me Matenayi; me Jiasu.

<sup>38</sup> Ndu shi l'eri Binuyi, luru phe nu bu: Shimeyi; <sup>39</sup> me Shelemaya; me Netanu; me Adaya; <sup>40</sup> me Makunadebayi; me Shashayi; me Sharayi; <sup>41</sup> me Azarelu; me Shelemaya; me Shemaraya; <sup>42</sup> me Shalumu; me Amaraya; me Jiosefu.

<sup>43</sup> Ndu shi l'eri Nebo, luru phe nu bu: Jieyelu; me Matitaya; me Zabadu; me Zebina; me Jiadayi; me Jiowelu; me Benaya.

<sup>44</sup> Ndu ono g'ephe ha be shi lukota unwanyi ndu ohozo; mbu lo duru ndu ophu unwanyi ono shi yechawaru unwegirima.

Bayıburu Izii  
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d